

粟香三筆

掃葉山房
石印

栗香三筆卷七

江陰 金武祥 桂生

I 242.1
318
(4)



乙酉季春。監鹽梧州。蓋四度西行矣。陳象九大令。為繪江鴻雪圖。汪君笑生。填買波塘詞。贈行云。越春風。片颿千里。綠波剛皺。南浦蓬窗。安穩郵籤。緩不比匆匆行旅。吟舊句。認歷歷江山。都是曾經處。新詩漫與看。瓊峽峯青。牂牁水綠。重到嶺西路。離筵畔。休讀文通小賦。浮蹤容易萍聚。如聞曹務優閒甚。一任輕裝來去。君記取。好點筆新亭。且作通翁語。顧況知新亭鹽監曰。吾欲貌海山中也。未妨小住。待荔熟。綃紅蒲分釀碧。東下作重午。余和詞云。笑年年。牂牁西上。雪鴻猶記前度。生綃畫出征帆遠。不盡蒼茫烟樹。添別緒。況潭水桃花。聽唱銷魂句。頻來訪古。恰冰井泉香。火山雲暈。吟稿待重補。嗟行役六載。難商去住。純蠶歸夢無據。蠻荒且喜消氛祲。好紀歲時風土。橫覽處。看形勢。天南鎖鑰三江固。徘徊起舞。正銅柱銘勳。金牌趨召。聞道格干羽。時關外大捷。方撤兵議。和故下閩及之。

蒼梧地名最古。舜南巡。曾否逾嶺。姑勿深論。梧州虞帝廟。離東郭四里許。依山面水。屋兩重。廢荒落。余初至梧。即詣廟得句云。迢遞牂牁幾溯洄。南交今值凱歌回。茫茫懷古無窮感。獨謁蒼梧舜廟來。

白鶴觀在桂江西岸鶴岡下。鶴岡一名飛鶴岡。名勝志云：南漢太守嘗鑿斷之。有雙鶴飛逝，故名。舊志云：山多松樹，白鶴羣集。余梧州雜咏有句云：遠浦波澄魚出穴。

季秋之月嘉魚出于穴

層霄露冷鶴橫江，即咏此也。觀建於唐開元中，中楹祀諸佛像。其右有

樓有亭，俯臨三江，頗極高曠之致。門首有聯云：孤鶴南飛山北向，大江東去佛西來。由白鶴觀南行數百步，有三界廟。其神為明初馮克利，潯之貴縣人也。生而好道，一日入山，逢八人分金與之，不受，與以敝衲，服之歸，預知人事，常有青蛇隨之。自云：道通三界，有司以其感衆，覆大鑪燹之三日，神色如故。時旱甚，命之禱雨，雨大降，治疫疫愈，始信其神。後遂祀於水西里。本朝屢著靈應，加封號。余入廟瞻謁，中祀神左龕，西向為青龍，右龕東向畫虎像，以配之。蓋後人附會龍虎之義，鄭露亦雅云：三界廟一名青蛇廟。陸祚蕃粵西偶記亦載馮真君廟小青蛇云：神能遣蛇相護，余見青蛇一色純綠，長二尺許，盤伏左龕，同游袁君以箸挑而翫之，甚馴。土人云：蛇出入多少無定，常以雞子祀之云。

梧州東郭外大雲山麓有冰井。唐元次山為容管經畧使時所鑿也。舊傳銘詞有：大山無火，冰井無冰之句。今銘石久湮，志乘具載。泉源不竭，終古常清。唐時於井之東南建冰井寺，依山成殿，以井為名。此境在雲水之間，所游在城市而外，硯度短約，交

陰松杉門臨方塘。雜時菱芡。入寺由左拾級以升。則漫泉亭在焉。亦以漫叟冰井而名者也。禪關選入已隔俗塵。小亭翼然。猶誌遺愛。再上有軒。前後各一。所以供眺覽。集游燕。皆會于此。南向古榕叢篠如隱邃谷。俯視幽花異卉。自成小園。挹鬱翠于簷前。認塔共于樹杪。品泉小憩。偷半日間。訪碣窮搜。得古人意。亦足暢旅客之游情。稱蠻荒之勝景矣。秋日偕徐氏昆仲游此。有詩紀之。云。為訪唐賢蹟。相攜佳客游。泉聲從古冷。山色向人秋。林缺晨曦逗。江空宿潦收。登亭思漫叟。碑碣試重搜。其二云。歸途得幽憩。高閣似憑虛。覓磴古苔滑。打窗黃葉疏。山城開畫境。塵世亦仙居。潭水明如鏡。何人此坐漁。

馮虛閣為準提禪林前楹。其額右有詩云。抱城江閣似馮虛。雲淨風閒月到初。想箇客來共斗酒。南山丙穴有嘉魚。皆前梧州守萬君木舟保所題者也。先經水月宮。旋越呂祖祠。半郭半郊。別開勝境。亦仙亦佛。同居一龕。游冰井而歸。為適中之地。登閣小憩。憑欄曠觀。隔江諸山環若屏列。夾堤雨水澄如鏡明。左為淨綠軒。蕉隱窗。虛花深徑曲。文魚五色。穿荇藻而逾妍。假山一拳。蝕苔蘚而彌潤。閒情偶寄。幽趣為多。蓋冰井寺曠朗出塵。此則清靜絕俗。各有其勝。未可以軒輊也。重九日偕蒼梧令顏君及徐氏昆仲。至冰井寺登高。余題聯云。冰井留銘且喜詩人。

足千古雲山如畫。恰宜此地作重陽。旋集馮虛閣。余復用前韻成詩云。佳節又重九。炎荒悵宦游。幸逢三管靜。高唱百蠻秋。風雨尊前合。烟雲筆底收。壁間題句在。酬和韻重搜。其二云。身世茫茫感。浮雲悟太虛。千秋憑俯仰。兩鬢漸蕭疏。純菜榮歸思。黃花憶舊居。何當掉頭去。蹤跡混樵漁。

蒼梧金石流傳者甚夥。唐元結冰井銘。僅存銘詞而石已佚。惟城東大雄寺為古感報寺。有南漢銅鐘。乾和十六年吳懷恩造。余撫搨數紙。款文凡八十七字。字頗秀勁。此寺殘毀過半。壞壁斷礎。魯殿無存。枕柳數十株。垂蔭山麓。老榕荒鮮。濃綠滿院。蒲牢一叩。猶聞古音。楊海琴觀察題聯云。兩度來游古寺斜。陽冰井幾回憑弔。秋風廢院銅鐘。

梧州當黔鬱桂三江之衝。其下有繫龍洲焉。脩然塵外。將十里而遙。宛在水中。為八景之一。江流浮玉。海石沈珠。此其亞矣。丙戌三月。扁舟小泊。蠟屐往游。古磴已荒。僻不成徑。孤亭漸圯。聞其無人。惟此危礫。歷劫未毀。時當春暮。益感勝遊。遂乃倚杖呼龍。披襟招鶴。唱大江東去。萬派爭趨。看爽氣西來。羣峯環拱。爰為歌曰。浩浩兮牂牁。匹四瀆兮莫南訖。惟斯洲之砥柱兮。願永靜夫蛟鼉。歌畢乃鼓棹而去。徐氏昆仲凡九人。皆予遠太守之子。太守經術詞章。有聞於時。其子多能世其家學。

余與晤於梧州者。為李同固卿。彥皋三人。李同名紹桐。有炙輠集。見贈詩云。文章有神契。山水喜人來。固卿名紹楨。刊有四書質疑。三國志校勘記。算學入門諸書。和馮虛閣詩云。高閣掛林表。登臨若步虛。不知秋氣冷。祇覺俗塵疏。彥皋名紹枚。年十九。詩詞已斐然。可觀。和冰井寺詩云。作客曾經此。三年記舊遊。寒泉重訪古。落木幾經秋。其所詣未可量也。

徐李同炙輠詩稿。三榕樹歌云。蒼龍拔鬚鬚墮地。衙衙化作三榕樹。三榕樹老已千年。蒼龍掉頭不知處。一株孤立差向前。兩株並峙相交連。寒枝飛舞剛鐵屈。蒼皮剝蝕頑銅堅。陰森十畝俯陰地。嵯峨百尺高參天。天半蒼涼起風雨。眼前突兀生雲烟。陰晴變幻在倉卒。碧雲翳天射寒日。迎面槎枒欲攫人。刺手鋒稜露風骨。盤根錯節紛支離。凹凸起伏爭詭奇。走如得勢馳怒馬。卧若偃息蟠虬螭。老幹中空透斜穴。孤根拔地懸半規。扣之應手金石響。鬼神驚泣霜淒淒。臃腫胡不中繩尺。不材容汝大十圍。如何交立臨中衢。幸免劫火供樵蘇。天生棄物不適用。螻蟻作穴鼠雀居。榮枯坐閱時代速。羣材用世何其愚。君看深山老松檜。時來偶慶風雲會。鑿削枝柯作棟樑。俯仰隨人互興替。世事茫茫奈若何。酌君杯酒聽我歌。留與野人作嘉蔭。子孫世守長婆娑。夜泊碓谷云。江上一峯秀。蒼烟數十家。頻年急兵燹。何處問桑麻。寒柝催

長夜青燐聚水涯。荒荒山外月。還照客舟斜。懷于晦若云。學海波瀾獨老成。賈生年少負時名。文章絢爛期千古。圖史縱橫擁百城。奇論不妨驚世俗。多才真覺動公卿。思君更憶幽居好。秋水空林一片明。

曾搏仙少尉。有和冰井寺重陽詩原韻云。又屈重陽日。鄉關疊夢游。巴江一回首。風雨十經秋。佳節尊前過。層巒眼底收。名山若奇句。那復憚窮搜。飄風摧落木。節候驗盈虛。林缺山爭補。天空雁到疏。重尋冰井勝。益慕水雲居。小艇蘆花際。蕭閒擬捕魚。曾名輝。四川酉陽州人。

查初白詩云。既來何苦又思家。又云纔卸行裝便憶歸。能說出遠行情況。家君思啖鮮荔。且欲觀嶺外風景。乙酉仲夏游粵。就養梧州。重九日有詩云。五千里外渡輪舟。予舍歡迎慰白頭。宦海幸逢寰海靜。老年補足少年游。牂牁水遠頻回溯。冰井泉香屢唱酬。一路喜聞寬大詔。德洋恩普到遐陬。

逢中恭讀
允法人和議詔
並發帑賑兩粵水災
豫居大孫伯

行裝
風塵

纔卸又思鄉。嶺嶠秋高未見霜。花木四時開一色。兒孫兩地作重陽。

留大孫伯

要識官難戀。耕讀還愁業漸荒。相約游踪剛匝歲。海天如鏡泛歸航。

山陰陳孝蘭名陔。去春為余作三筆駢序。並寄示近作二首。有句云。即持牛耳登壇晚。便畫蛾眉下筆難。是秋歸浙江鄉試。以第一名發解。牛耳之語。遂成詩讖。

壬午道出陽朔。曾錄壽陽書院楹聯。載二筆。為貴筑顏君嗣徽撰。令監鹽梧州。適顏君令蒼梧。往還頗稔。蓋三年前即有翰墨緣也。旋出示其望眉草堂詩文集。長古縱橫變化。烏雲豹歌。塔忠武公馬也結尾云。嗚呼。江左年來苦用兵。武昌以下無堅城。紛紛驚駘伏櫪下。帖耳垂頭何苟且。問誰得似塔侯者。無其人。并無馬。次韻和王鶴琴辭官云。風塵不耐作羸官。黃鶴高飛遠勢盤。純菜鄉心因賦別。梅花天氣正衝寒。乞湖賀監容疏放。飲酒淵明善達觀。堪笑筱簾自羈絆。蕭閒那得似石安。揚州云。鯉魚風起柳絲絲。正是江潮欲上時。那得漁洋清麗筆。虹橋重唱冶春詞。五言斷句云。春雨濕芳塍。曉來看無迹。又云。急雨勢欲來。風聲挾樹吼。七言贈杜子明云。捫蝨談兵懷壯畧。聽雞起舞破愁顏。和錢萃民云。歌興同谷憐諸妹。表讀瀧岡痛早孤。感作云。築圃農稀紅穗晚。趁墟人少綠蕪深。保定云。分陝位隆周太保。專征節假漢將軍。衙齋夜卧云。黃爐痛飲傷零落。白社聯吟恨別離。秋闈分校云。雲路共期酬遠志。風簷何敢負初心。顏字義宣。庚午貴州省元。在籍時。上書論時事。動中竅要。黔事底定。多為其所逆料云。

沈文慤選別裁詩。以黔滇天遠。無從搜羅為憾。余既獲交貴筑顏義宣大令。錄其詩。復出示其同邑亡友錢萃民芋巖詩鈔。萃民名衡。以拔貢作宰中州。不數年卒。遺詩

一百數十首。義宣將梓行之。諸葛武侯祠云。抱膝斯人往。迢迢烟水深。祇今千載下。誰作卧龍吟。曠代君臣契。平生伊呂心。歸耕獨未得。斜日柏森森。荊州懷古云。東流日夜走江聲。不為登樓感已生。涼月自低曹氏壘。春濤猶打呂蒙城。霸才終是偏安局。形勝猶關過客情。更有小朝廷可惜。襄樊坐失恨難平。斷句如君看濟時才。自有從容度。又云讀書必善用。或不失之偏。可以想其志趣。

去歲夏五月。有宋梓儕太守廷樑。遠寄詩函。略云。去歲樑在滇南。客有攜粟香隨筆。至自章門者。樑讀而愛之。前月至章門。晤李君秀峯。語次及君。益深嚮往。樑雖不工詩。而詩友之間。固多工詩者。因抄寄懷人詩八首。送別詩一首。以結文字緣云云。旋得秀峯書。謂宋君雲南晉甯州人。以進士需次江西。工於詩者也。懷王益吾司成師云。賞音文字三條燭。贈別瓊琚五字詩。懷楊慎齋孝廉云。分謗累君傷積毀。遺愁為我集羣賢。懷楊偓叔同年云。離情滇海深千尺。別夢黔雲莽萬重。懷沈意文方伯師云。上考署纔歸杖屨。離愁積久答書遲。送別趙樾村同年。歸劍川起句云。笛聲吹破湖天秋。鄉心一夜生高樓。金甌無那送新雁。雲山萬疊添離愁。豪邁跌宕。近賢中酷似兩當。

許午樓大令時中。自蜀寓書。言獲觀隨筆。並道契闊。書末繫以詩云。萬里橋邊萬里

船相思載不到君前。暮雲春樹徒惆悵。為寄花溪一幅箋。

甲申春仲。周涑人直刺星警。自粵北行。旋聞其權無為州牧。乙酉秋。以所刊自著傳忠堂古文寄示。並以徽墨宣紙為贈。遠道嘉貺。方擬作書報謝。即聞其卒於任。所詳符周氏。又弱一个。老成凋謝。不獨為知己悲也。

涑翁復寄示。昀叔都轉日記三冊云。亡弟所著。懶不自收拾。存此而已。余按昀翁東瀕詞二卷。其弟季貺太守刻於閩中。近古體詩。余為搜輯。僅存四十餘首。近復以日記摘錄付梓。名曰鷗堂日記。庶不負老友遠寄之意云。

鷗堂日記云。徐鐵生觀察。善為詩。性愛才。常若不及。曾於臨城驛見余。早歲題壁詩。歎其工。為詩記之。有老子平生無此句。天涯沿路訪斯人之句。並予詩俱載懷古田舍詩集中。予題壁多不署姓氏。故觀察終不知詩為予作也。觀察已矣。每念知己之感。為之泫然云云。余按懷古田舍詩。乙巳集下。為乙巳年作。有發河間府二十里鋪。憶壁間詩不置。七律云。壞牆親拂隔年塵。意外相逢眼為新。老子生平無此句。江湖沿路訪斯人。用袁子白句迷離入夢猶詩境。歷碌驅車又旅塵。日日風沙星露裏。與君一樣歎勞薪。附錄拜夢生題壁詩云。暮烟茅店駐征車。滾滾驚埃日易斜。詩壁拂塵鈔賸草。歌錢隨例乞閒花。客愁入夜常依枕。短夢驚寒未到家。苦被雙贏催促去。又披

星露踏風沙

宦游嶺石。雄于詩文者。以秦文伯觀察為最。嘉應黃雁賓太守鴻藻。與交最久。文伯嘗題其退思書屋詩草云。誰識玉龍金馬外。有人嚼雪咏梅花。又云。宦海誰如我輩豪。可想其詩清而興豪矣。雁賓先以孝廉官京曹。旋以太守官嶺石。今歲晤於梧州。見示詩草。送張蔭南同年之官閩中云。昔人重內官。乃以登仙擬。今人重外官。已非昔人比。人情自今昔。內外無二理。張侯磊落姿。其才非百里。志在作儒臣。始願不及此。我識張侯心。行役嗟陟屺。微祿為養親。風塵詎得已。不見古毛生。捧檄轉色喜。將父竟不遑。嗟我亦人子。遊祥雲寺云。登臨來古寺。上界一聲鐘。路入山腰曲。雲垂谷口封。僧閒都似鶴。樹老半成龍。長嘯出門去。前溪又幾峯。山居秋夜云。松影參差覆翠微。幽人向夕閉荆扉。板橋霜冷客初渡。山徑月明僧未歸。何處疏鐘來隱約。前林遠火尚依稀。此中深趣知誰領。避世真成太古希。春日雜興云。滿庭春色爛雲霞。小立東風帽影斜。萬種閒情拋不得。倚欄看遍碧桃花。憶山莊云。窗含月影花枝瘦。枕繞泉聲客夢涼。一榻孤燈思舊事。廿年陳迹付山莊。

退思書屋詠古詩亦多。余愛其邯鄲絕句云。我到邯鄲不成夢。由來得失付天公。算來除却神仙外。塵世誰非夢裏人。皆妙。太守之子公度觀察遵憲。前以孝廉副使日。

本成日本雜事詩一百五十四首。尤見家學云。

粵東西為鄰省。宦粵西者。以粵東人為多。且多詩人。黃雁賓太守外。如陳硯皋江鏡河兩大令。司徒簣莊少尉。其最著者也。硯皋有壽竹廬詩鈔。上灘有感云。歷磔經灘路不平。天寒霜冷客長征。不堪離別親垂老。如此風波我尚行。客意勞如秋柳亂。鄉心忙與急流爭。年年來往雲中雁。嗟爾飢驅萬里情。斷句云。夜漏偏于獨客長。又云。囊錢疏似曉天星。其旅況可想。硯皋名展雲鎮平人。

江鏡河詩云。衣冠束縛百骸拘。宦海茫茫著腐儒。燕領虎頭非我相。鼠肝蟲臂任人呼。不勞卜式勤輸粟。何事齊廷笑濫竽。身世詎煩詹尹卜。故吾不失即今吾。司徒簣莊詩云。海水羣飛日色昏。征南笳鼓動關門。時危獨下卑官淚。秋老誰招戰士魂。有詔已傳徵俊入。無家還擬蹈邱園。飄零弟妹三巴遠。夢裏關山鞠又繁。江名有燦連平人。司徒名禕。開平人。二詩皆于其自書扇頭見之。

蔣筠軒太守兆奎。以何子貞太史。挽其封翁蔚齋先生聯。截字裝冊出示徵題。聯云。子舍歡娛飽看芝山徵壽色。歸舟安穩忽驚菊徑隕秋風。冊中自左文襄以次題者甚多。周昉叔都轉云。子貞前輩與先文之朗山兩兄同舉丙申會試。朗兄官吏曹。過從甚密。道光癸卯甲辰間。譽讀書十間房邸中。距廠肆不一里。貞翁每遊廠肆。必願

邱齋嘗見翁一手挾書一手持寒具且行且啗。朗兄笑謂翁茲奇磊落可笑人。大有晉宋間人風趣。至今追憶猶爽爽在心目中。不能忘也。翁輒蔚齋先生聯二十二言。筠軒太守裝池成冊以垂將來。先生之賢與翁書法之妙。炤映衡湘各有千古。豈獨鄉邦生色而已。筠軒以名孝廉筮仕粵西。學行粹然。聲譽甚熾。異日本庭訓以飾吏治。施于有政。用貽令名。亦惟根此不忘其親之心。以推暨之。其為孝不益大乎。

許月樵學博有游城東諸寺詩云。踏遍溪橋路幾彎。又從花底扣禪關。寒塘細雨三分水。斜日春城一角山。尚有樹知前代事。更無人有老僧閒。尋詩倘遇雲林社。先哲

風流不可攀。

城東有雲林詩社。鄧方舟先生建。

次聯城東景物如繪。余復愛其五言。心字兩聯云。送

客出門去。扶筇生遠心。西風吹落木。葉葉動秋心。皆妙。許名懿林。甲辰舉人。梧州宿

儒。卒未十年也。

許君同時同邑有施香海明經。名彰文。咸豐七年殉難。其弟子以衣冠招魂。葬於準提禪林之麓。事詳邑乘。平生敦尚氣節。篤好風雅。所居濱江。可眺蘇山。因築挹蘇樓。觴詠其上。刻挹蘇樓同人詩鈔遺詩三卷。七古頗豪放。五言云。柳底掩柴關。浮生祇愛閒。幽居宜傍水。秋夢不離山。得句憐詩瘦。爭棋笑客頑。久忘恩與怨。黃雀莫銜環。七言云。戍鼓聲催落月黃。滿天寒色滿篷霜。舟隨鳬雁歸前浦。人與琴書共一牀。平

野烟消甘蔗潤。疏林風度早梅香。慈親昨夜思游子。遙識燈前語夜長。喜猿匪投誠云。馬前泥首亦何因。誠信由來易感人。走險偶然為劇盜。荷鋤依舊作良民。天心止欲誅張角。民意惟思借寇恂。寄語千秋為吏者。虎狼雖暴豈難馴。斷句如江光搖塔影。人語雜灘聲。殘虹收霽雨。獨鶴破江烟。吟懷孤似月。秋夢冷于雲。思入青山詩有骨。行隨流水客無心。隔林燈閃村厓吠。半夜潮生水鳥呼。雲迷洞壑晝疑暝。雨過陂塘夏亦秋。皆佳句也。

藤縣蘇琴舫舍人名時學。嘗選施香海及王介臣詩各二卷。合刻之。介臣名國賓。德慶州諸生。送友之燕京云。木葉下牂牁。蕭蕭擊筑歌。送君之易水。為我弔荆軻。屠狗英雄盡。盧龍古塞多。山川空滿目。歲暮感如何。斷句如夜涼知有雨。色淡已如秋。小閣燕如新客至。殘春花似故人疏。皆佳。

亦雅論粵西左右江云。按地形左宜為右。右宜為左。夫粵處南陬之西者。皆從東粵。或下離水溯流逆上。從溯流者分左右。不從地形分左右也。

梧州督銷臨全十五埠。大江四十二埠。粵西全省引地已居八九矣。粵人所謂埠。即商人所開之鹽館。畧如雨淮之所謂岸也。考埠字正字通云。同步舶船埠頭。通雅云。埠頭水瀕也。又籠貨物積販商泊之所。

水經注。贛水逕王步。步創有城。蓋齊王之渚步也。述異記。吳中有瓜步。魚步。龜步。湘中有靈妃步。柳宗元有鐵爐步。記江之許。凡可步而上下者曰步。青箱雜記。嶺南謂水津為步。有曾步。即漁者施罾處。有船步。即人渡船處。通俗編云。俗謂問渡處曰埠。頭據諸書當作步字。而宋史皆從俗作埠。度宗紀有武陽埠。熊本傳有銅佛埠。劉錡傳有黃連埠。趙淮傳有銀樹埠。宋以前未見用之。

光緒甲申。粵中海防戒嚴。築礮臺塞海口。乙酉夏。西潦為災。西關水深數尺。因與汪君美生有廣州西關築城議。擬屬臺而未果。因誌其大畧於此。以俟後之君子採擇焉。廣州內城為明洪武十三年。連三城關而廣之。今謂之舊城。其外城則創建於嘉靖四十二年。是謂新城。國朝撫綏嶺表。以舊城之西半。居駐防旗營。而紳民之居西關者。日就繁庶。甲於新舊二城。西城之西。臨洋人沙基。西南近白鵞潭。水最深。廣洋舶巨艦。由西路而來者。多泊於此。一旦海疆有警。黃浦南石頭攔阻不及。兵臨城下。飛礮所及。西關首當其衝。倉猝防禦。一無所恃。將若之何。計惟於無事之時。增建西關外城。復於城之西南隅。築礮臺以輔海防之不足而已。其增建西關外城。請自新城太平門之南接築。循珠江至沙涌。折而北。至街尾。折而東。接舊城西北角而止。基址應如何曲折。民居應如何拆城壕。南面臨江。西面則由沙涌而北。本有水道。淤讓俟官紳會勘時再行繪圖核辦。

而廣之。惟北面須接鑿若干丈。其礮臺之設。城西本有西甯西關水清三臺。已廢。今擬於城之西南隅。設礮臺三座。如甕城然。與城相為輔翼。白鷺潭有敵船。即可緊對轟擊。則敵船勢必受創。不能久泊。此增築西城及附建礮臺之大要也。而西城之建。其利尚有二。尋常盜賊之警。有城啟閉。較之柵欄。其慎固不翅倍蓰。盜賊不敢覬覦。市廛益形安堵。其利一也。西關地勢窪下。西潦漲發。即成澤國。今歲民尤苦之。今既築城。則遇水漲之時。於城門設版堵禦。旬日水退復啟。勝堤壩捍水之功。無沈竈產龜之慮。其利二也。尋常尚有此二利。況會城瀕海。倘遇洋艘進口。則得此外城與礮臺。大足輔海防所不及。金湯之固。百世永賴。及此未撤防勇。藉以助役勦勦。被水災黎。亦可以工代賑。事半功倍。正值其時。至東關亦應一律增建東城。勦立礮臺。以防東路。於形勢亦較便利。

西潦為災。肇慶首當其衝。齒城壞廬。諸園隄尤易潰決。蓋由羚羊峽束縛。宣洩不暢耳。城外之水。平時亦滯洄湍急。往來舟楫寄泊者。偶遇風浪。便易覆溺。商旅尤患苦之。癸未年肇羅觀察勞君泊此。夜半風起。覆舟。此近事也。竊謂水勢宜分。分則順軌。肇慶城上游數里。本可分流。繞城北穿景福園。出羚羊之背。而合大江。似有故道。計分流約三四十里。城北瀝湖在星巖之南。地本澤國。因勢利導。易於為功。一旦分流。

實有二利。水得分洩。隄易保全。一也。江水別出。舟行有避風躲水之所。商旅稱便。二也。惟開鑿時。民田廬舍多所遷徙。此則大利所在。不恤小害。在當事之臨時審慎。未可因噎以廢食也。

廣東新語云。肇慶江干多石磯。古無泊船之所。或謂東門外里許。有躍龍橋。其下水竇兩重。為崧臺石室一帶山水之所從出。如徙此竇深入三四里許。渚水成灣。可泊大小船數百。免風濤不測之患。且於本城下關甚利。竇旁居人稀少。田疇不多。官買之築堤。約費數千金而已。此似可行云云。余按此第為泊船之所。不如由上流城西疏鑿繞城北。越羚羊峽之背。而後合於江。不獨泊船有所。且可避峽流之險。尤貴分殺西潦。宣洩較速也。

黎二樵端州詩有云。牂牁西極如綫來。至此孽地風濤開。羚羊咽吭不肯一吸盡。吮逆倒壅屯雲雷。山巖水猛雨不下。地弱往往蒙厥災。此可見肇慶水災之烈矣。廣東新語云。新興河頭有渠形在林阜中。若疏鑿使水南行三十里。直接陽春黃泥灣。可以通高雷廉三郡舟楫。免牛車挽運之苦。亦數郡之利。陽春鄧元光端州小紀云。嘉慶間。大府欲興水利。屢委員勘視。均報不能行。道光九年。制軍李撫軍盧復委肇羅道許署肇慶府金。親行履勘。自河頭至黃泥灣。陸路五十里中。多岡嶺村落。田